

香蘇山館詩集

香蘇山館古體詩鈔卷十

東鄉 吳嵩梁 蘭雪

舟發南昌

昔來菊未開今日花無數秋色豈不佳
枝枝飽霜露載花歸故園繫船就江樹
一夜鯉魚風天晴峭帆去船頭一尊酒
船尾千枝花風軟水亦平布帆終日斜
我醉仰天卧月明生淺沙笛聲來近船
谿漁知幾家

樂平張公祠

名彥方事見明史陳彥回附傳國初賜諡忠愍乾隆中敕封忠

貞慈惠之神

鐵騎渡江天地昏陣雲夜壓金川門周公自立成王焚

縣令何者今張巡彈丸之地蛾子軍隻手乃欲扶乾坤
以心許國忘其身生能殺賊死亦神靖難兵興豈天意
驟削五王原失計北平封早徙南昌公等優游但循吏
將軍耿李特兒戲五十萬兵敗塗地事危始用鐵尙書
江上孤軍亦終潰當時守令非乏才姚王繼死殊可哀
誰知奉母張文矩附傳勤王陳彥回公官不願給事中
板輿乞養來湖東一朝伏劒殉全室承歡地下初心同
清白堂前一坏土譙樓廢井俱千古大書母潘烈婦陳
請增祀典鐫貞砥

饒娥灘

老翁醉漁墮江水蛟龍攫人敢狂喜女兒淚盡蒼天高
馮夷送出波心裏柳州斷碣今荒祠嗚咽灘聲似舊時
寒閨生小天倫重豈知世有曹娥碑

鄱陽胡忠烈祠

番君廟壁題畫松天心已鑒臣孤忠擢臣諫官改廷尉
誓報國恩以死繼叛臣賣國燕師來六宮一炬燒成灰
麻衣慟哭聲如雷殿前武士揮金椎臣齒碎裂罵逾厲
臣皮慘脫心難回臣家臣族棄東市臣死下見高皇帝
陳瑛之肉狗彘食燕王萬古稱篡賊天風獵獵雲旗招
雪冤之榜騰九霄有女孝貞今祀神燈夜出胡家橋

爲張鶴舫教授題尊甫梧岡丈種竹圖

有田十畝屋一區先生種竹兼讀書綠陰如水瀉堦除
涼烟裊裊風疎疎老鳳宛轉能將雛鳳兮飛去雛亦孤
仰天拊翼增歔歔孫枝玉立皆可扶芸編插架丹黃俱
嗚呼先生今則無

陳秋河明府爲余題武夷廬山紀游詩後賦答卽
送歸閩中

君官但飲洎江水君行未買章門船一尊潦倒復同醉
芝山日暮花成烟酒酣高詠聲徹天拍手喚我詩中仙
我詩豈有淩雲氣信筆惟知寫胸臆憂患如山二十年

月地花天皆涕淚去年游武夷今年入廬山腳根踏雲
袖傾海始悟此境非人間君抱妙明心蓮花作詩骨尋
秋曾陟幔亭峯探得驪珠大於月掉頭一笑謝風埃扁
舟九曲應遲迴買山有約吾能踐五老雲中策杖來

趙忠定公故宅聞在琵琶洲今已久廢宋理宗御
書梅巖舊蹟亦不獲見詩以紀之

宗臣恥言定策功一魁豈復留胸中生前具錦棄元輔
身後配享尊王公布衣蔬食道不窮子弟乃能師晦翁
梅巖字蝕蘚花碧山堂萬古題雲風

堂楣相傳爲朱子手書

堂上

冠山堂下水琵琶洲斷蒼烟裏孤艇三更寒月高扣舷

我但歌離騷

桂秀才墓

名秀字子實餘干諸生正德三年劉瑾黨潘泰知縣事激民變大盜余乾七等

爲亂秀率其子及門生俞相等禦之賊斫其首猶騎驢怒馳三十里乃仆墓在東山麓相傳舊碑爲雷火所書事載縣志未詳今爲補錄

孤城斗大賊如蟻身陷重圍心不死驢背風來戰血腥
頭斷更馳三十里萬劫東岡土一坏猶聞異事感風雷
師生父子今同傳誰似餘干桂秀才

雪中過桐江

曉寒一櫂趨嚴州桐江得雨成奔流迴風忽捲萬花舞
烟水欲窮天盡頭七里瀧前櫓聲急夾岸千峯皆玉立

上天下地無纖埃逆風順水相低徊峭帆葉葉蘭谿去
咫尺回看不知處

江光黯澹天四垂孤篷就泊方晚炊欲覓紅鱗斷漁艇
杯酒遙奠徵君祠祠邊釣石俯千尺積雪入雲同一白
長松偃蹇纏枯藤凍枝往往摧懸冰西臺萬古感蕭瑟
江上一星猶作客

積素連峯天愈曠風力濤聲寫清壯峭寒入骨詩夢醒
一葉中流已輕漾瀧口漸出江面寬晨光一鏡生迴瀾
數峯窈窕出寒翠殘雪初消態增麗白鷗亦愛朝日晴
烟波浩蕩來尋盟

桐江佳處尋詩遍雲水空明月淒豔秋葯冬花吾故人
馬太常履泰
奚布衣岡曾畫清游人橫卷扁舟來往三十年橘枝
舊曲人爭傳青山笑人今白首偕隱初心太孤負笛聲
嗚咽當奈何平生哀樂中年多

望岱

二十年前陟岱頂夜看初日升扶桑青天紫海入襟袖
醉筆一擲雲茫茫今年孤櫂剪江出雪花片片隨風檣
吳山越水縱清妙曠覽豈能窮八荒壯游至此記疇昔
恨不舉手摩穹蒼萬峯細碎若沙石何論秦松漢柏參
天長帝王自古侈封禪薄德無取稱嘉祥

聖朝祭告有專使至誠所格惟馨香劒戟比來鑄農器
偏災默化爲豐穰膚寸之雲雨天下願資治理調陰陽
陶雲汀澍侍御見示使蜀詩草卽書其入棧出峽

二圖卷後

蜀中之游何快哉天以山水資奇才太白東坡骨已朽
萬古生面須重開大江澎湃山崔嵬君持使節往復來
關削危峰插霄漢峽束巨浪旋風雷其氣磅礴音壯哀
收入詩境眾妙該神斤鬼斧天鑪錘惜乎畫史不解此
但寫雲林雪棧灩澦堆瘦馬蹠蹠征帆催我卧讀畫心
徘徊不若誦君長句痛飲三百杯雲海浩浩天風迴

雜詩十首

盛夏苦炎熱一雨生驟涼適意乃爲患寒燠難周防端
居百憂集庭前幽草長夕漏厭殘滴晨鏡飄新霜
賈誼論時政陳亮圖中興哀哉兩少年孤忠取羣憎一
斥不復用千載猶見稱閉門事佔畢老矣吾何能
勞勞梁上燕啞啞庭前烏擇地思營巢及時思反哺薄
祿待升斗暮歸倚門閭衰親養難求進退增踟躕
班姬懷棄扇江妃感貽珠當其奉恩始自謂終弗渝容
德豈不美謠詠乃見疎深恩未可恃薄命當何如
浮雲南北合溝水東西流水聲自嗚咽雲意何綢繆同

心而離居昔賢抱沈憂同居心不同吁嗟我何求

鸞鶴負標格飛鳴常與偕一朝鍛其羽遂令雲泥乖鸞
翔集高樹雀病啄秋苔樊籠閉孤影清淚難爲諧

嘉樹植名園當春自葳蕤夕葉泣華露晨葩麗晴暉其
陰有小草託根殊細微采佩苦不早零落將安歸

丹陽有豪士坐遣傾城姿延陵有故人掛劍墓樹枝修
蛾與純鉤脫贈亦何爲意氣一相許生死兩不移

鴛鴦愛比翼文采相歡娛鸚鵡矜語言機心詎能無不
若雙白鷗出沒烟波俱江湖自忘我我亦忘江湖

鬱鬱復鬱鬱聽此勞者歌改絃而更張其聲終未和願

言養琴德寂寞棲岩阿知希儻足貴吾意寧蹉跎

孟秋十七日王子卿侍御邀同汪澣雲陳石士兩
侍御劉芙初蔣秋吟兩編修程香谷太守游二
牖歸飲寓齋作潞河秋汎圖

閉門兀坐床擁書出門潦倒泥陷車扁舟一笑落吾手
渺然心已歸南湖秋水可憐纔數尺照影粼粼漾寒碧
故人相對今華顛詩夢低徊三十年

高牖跨河如大橋石能束水水不驕懸流卻從石縫出
水電激射風蕭蕭上有青旗飄酒字老翁賣魚蔬入市
下有乳鴨千百羣一櫂驚飛如白雲

雲陰漠漠水氣涼廢園夾岸多垂楊蛾眉聯娟掃晴黛
卻指西山在船背蹇驢緩步船隨行百丈搖曳如有情
忽然斜掠菰蒲去葉葉枝枝秋雨聲

雙蓮節過已浹旬谿山得雨尤清新國初諸老汎秋地
風韻百年此能繼水利平生譚潞河壯懷不及清游多
月明十里送歸棹花底來傾金叵羅

蔣秋吟編修邀同人游慈仁寺觀古松王子卿侍
御爲作圖

雙松天矯負奇骨其一化龍飛上天孤根兀立老逾勁
雷燒雪壓會無權旁有四松皆晚出少者壽亦三百年

下直購書尋古寺此是阮翁舊游地
偃蓋陰中導客來
一笠寒雲覆深翠詩禪得髓誰連洋
滿院惟聞松子香
手栽我願記今日松羔後亦參天長

宋梅生觀察自蜀入 覲遷任蒼梧枉過話別卽

送出都兼寄李松甫比部

君作漢家守我入匡廬山袖中一卷詩飛動鞋底萬峯
雲往還人海蒼茫十年別醉墨如烟鬢成雪故人索米
仍金門使者驂鸞先絳節驛路迢迢指桂林九疑蒼翠
撲衣襟因君一訊韋廬叟江水相思孰淺深

王石谷漁洋山莊圖爲陳伯芝

蘭

明經作兼呈覃

谿師

漁洋有此山莊否山與先生俱不朽小築能成卽輞川
華詩只在山前後先生當日領西臺朝上封章夕文酒
夢遶法華江上山圖成石谷山人手山人之畫先生詩
妙以神光參合離憑收海岳蒼茫氣寫出烟雲澹宕姿
蘇齋論畫卽詩髓樓閣仙山現彈指昨來滿院木樨香
笑說吾無隱乎爾我家卻在南湖灣山影動搖空翠間
草堂著句二十載主人不歸雲壑閒詩境詩舫緣非慳
秋林依舊斜陽殷讀書許踐平生約門掩香蘇畫裏山

是日值漁洋先生誕辰覃溪師嘗置酒詩境軒及余
石溪詩舫爲壽各臨文與也爲先生所畫秋林讀書

圖一幅又爲余作香蘇草堂圖詩今已二十六年繪圖者桂林朱君小岑亦高士也

送劉芙初編修乞假歸省陽湖

玉堂宦味水一杯敝車碌碌趨塵埃神仙失意尙如此
下士感遇胡爲哉秋風昨日凋庭槐慈烏反哺鳴聲哀
老親八十髮皤皤愛君遶膝如嬰孩望君日夜歸帆催
君計決矣毋徘徊大河東潰高岸頽江鄉萬頃田污萊
牧民良吏籌偏災蠲租布賑賑善該君往佐之民氣培
時事如此笙詩暇日歌循陔卽此可驗匡時才我歸五年今
再出一第願博慈顏開縱使得之亦同病何況偃蹇仍
鷺駘平生意氣顛若雷不樂詞賦師鄒枚萬間廣厦落

何處此身槁木心死灰凍雲夜壓黃金臺典衣爲君具
樽罍酒酣一慟握君手南望家山腸九迴

朱蘭坡

珩

庶子母夫人霜帷課讀圖

兒父已歿母始歸以兒爲嗣成庶幾朝夕告天心禱祈
兒方襁褓嗟何知以教以養賴母慈母身兼作父與師
霜風颯颯吹破屋一燈如豆夜深綠書聲才斷淚痕續
兒倦不敢屏風觸鄰媼睡醒戒兒哭朱家有兒猶夜讀
兒能讀書行益修兒名已成母不憂旌閭表宅非所求
兒簪彩筆登瀛州母樂閒居輕宦游琴魚笋脯江鄉秋
嗟余有母今白頭春暉寸草百未酬展君此圖雙涕流

歸夢昨夜隨扁舟

寄樂蓮裳孝廉爲其母夫人八十壽

臨川有賢母其子能文章與我同歲生居復隣東鄉論
交如弟昆拜母同登堂君母及吾母儷若姊妹行當時
兩少年意氣殊激昂側聞人倫鑒似許杜與房荏冉三
十年負米天一方兒心比春草母髮成秋霜君奉板輿
出全家依蜀岡嚮文得善價甘旨猶一嘗我媿狗微祿
進退增傍徨反哺烏夜啼聞之淚霑裳會將棄雞肋典
衣治歸裝從此比屋居同舉介壽觴迢迢白雲遠裊裊
秋風長誰云菽水味不及蓴鱸香

陶雲汀侍御招集印心書屋以安化茶屬賦

芙蓉嶺春嬌吐芽茱萸江水晴照沙石鉤細煮松聲裏
渴憶家山夢尤美豪家七箸多腥羶此味清嚴妙入禪
勵雲吾愛康王谷曾試人間第一泉

黃左田少司農惠貽西齋集有開元鐵牛歌請雨
詞郭有道祠古槐崔府君廟諸作吳子讀而感
焉所稱府君者卽唐詩人崔珣也

黃河駭浪高于山鐵牛僵卧沙地閒白衣呼天淚霑土
石佛低眉龍不雨人間旱潦豈天意調燮因時須早計
江鄉連歲蠲積逋采風誰繪流民圖

先生有道剛不折樹亦如人枝屈鐵府君麗句吟鴛鴦

牒虎自殺龍深藏

梓澤鎮志載崔爲長子令政績如此

古來才大難爲用

士以目論足心恫萬事浮雲雙鬢星掩卷吾愛西山青

旌表貞節曹母彭孺人詩爲曹雲浦副憲文作

金閨有女冰霜姿十二齡賦共姜詩生前不識夫容儀
死爲執節甘如飴三十四載無少疵身未蓋棺心可知
惟夫有兄風憲持爲弟立後成庶幾在室事親歸撫兒
女順婦貞母則慈身心百鍊命一絲藥力不到神扶持
以此旌典當及時格于吏議方然疑封章入告

帝曰咨彭曹兩姓皆勲楣有此節媛揚清徽予以褒獎

毋後期且慰貞疾延期頤

恩榮曠古非所祈先臣地下俱涕洟教忠教孝由此基

願書彤史敦倫彝

送洪孟慈出宰東湖

毘陵故才藪舊游多老蒼

謂趙雲松孫淵如楊蓉裳徐惕庵諸公

君家名

父子志節非尋常我獲論交已爲幸敢與紀羣爭顏頤

往者謫仙游夜郎

謂尊甫稚存先生

看山萬里還故鄉酒酣邀

我政卷尾擲筆海岳爲低昂新詩自喜有劒氣謂我字

字珠騰光

先生自塞外歸屬題荷戈賜環二集自謂其詩劒氣多于珠光余詩珠光多于劒氣妙喻

入微愧余不克逮此耳

蓬山十載跨鯨背斯言感涕猶沾裳惜哉

經世抱奇策著書但許名山藏君才卓犖萬人敵不願
俯首攻詞章一行作吏差快意旌旗獵獵春風長親民
之官古所重漢廷公輔皆循良能推詩教恤民瘼未必
李杜非龔黃東湖一縣況新設地交楚蜀稱岩疆山川
險要資戰守風土朴厚先農桑百鳳一鶚恥且格惠以
春雨嚴秋霜

國恩仰報職斯稱家學克繼身逾昌吾儕冗散愧何補
勉求寸祿娛高堂會須投紱理歸櫂躬耕偕隱廬山陽
濟時妙用賴公等幅巾林下容疎狂

題蘇齋話別圖送章明府赴任東鄉

爲政有本末講學求淵源執經君最早同出蘇齋門吾

師今大賢業廣道益尊杜房出陶鑄許鄭游籬樊

曹儼笙相

國蔣礪堂制軍姚秋農少司馬王達府少宗伯君才旣淹雅治行復清敦司鹺

嘗小試萬竈回春溫遺愛在浙西謳思矢弗諉專城責

斯重綜要而理繁惠澤若時雨自葉當流根始知經術

貴輦悅安足論

吾邑建稍晚地瘠民故貧河道久堙塞漕政多苦辛賢

令昔治此害除利亦均成法豈不美積弊生因循君當

下車始萬卉延陽春善養民力紓善教士氣新同縣或

異俗剛柔貴因民東南使強立西北使漸馴我昔纂圖

志美刺頗具陳美者邀眾譽刺者遭俗瞋能瞋卽知恥
勸懲發其真導之使向善庶幾風俗淳予作風土志有議其兼載敝俗者蓋欲其愧而知改耳

吾家距城遠僻在蘇山隅先人故廉吏身後餘官逋鬻
文三十年所入無寸儲

國恩荷寬宥吏牒仍追呼一官呈朝籍薄俸先已除衰
親待祿養天寒倚門閭年豐苦難給歲歉當何如以此
畱京師進退心鬱紆明日送君行暗淚沾衣裾草草付
家信歸夢馳香蘇

述哀

天地豈不寬吾身獨窮迫昨日反哺烏今朝墜巢翼母
生無暫歡兒死有餘責覩顏尙人間艱難事窀穸

嗟我少失怙奉母三十年公私遭多難溝壑憂早填昔
以遠游累今以薄宦牽乞養胡不果積悔生遷延

遷延悔無及銜恤當星奔風木抱長痛冰霜銷旅魂羣
公拯憂患感逮歿與存負土幸有日飢寒非所論

讀守意齋詩集呈制府百菊溪先生

詩教古所尊采風有專職相感惟性情其用達家國後
人炫華藻高者負標格本原苟未探雖工嘆何益我公
起三韓間氣鍾秀特天授將相資命以忠孝植論詩乃

緒餘所造必臻極上希周召風下拔杜韓幟古今幾壇
坵生面許重闢亦如名世人五百年一覲霸才時豈無
嗜奇矜創獲驟雨盈溝渠狂花委朝夕矯枉或過之甘
受古人役不窮海岳觀焉知見聞僻才大公獨兼變化
泯繩墨胸無一絲塵腕有萬鈞力

弱冠誦公詩今且三十年根柢苦不厚學步難爲妍公

與青浦師

故司寇王述菴先生

造就心勤拳往往探新句拊節公

卿前當時數吟侶適園推最賢

今冢宰英照齋先生

哲昆

小昆香岩

及

二譚

蘭楣鐵簫

才調俱翩翩驥足一以騁萬里生雲烟而我

數獨奇一官如蛻蟬祿養悔無及視息皆苟延黎公昨

話舊暫泊清江船謂公聞噩耗太息觀遺編

湛溪河督出劉文清

公書及余詩一冊同觀時有誤傳余已下世者公爲太息不置云

嗚呼士氣卑干旌殊

邈然愛才一存歿此義心骨鏤餘生幸未畢歸求丙舍

田閉門執瓣香或附名山傳

李海帆明府龍湫紀游圖

在平湖之陳山

李侯身是釣鰲客放眼每愁天地窄一杖飄然海上來

看雲坐倚磐陀石石邊突兀龍母墳神怪出沒難具論

年年龍子歸洗墓雷雨欲撼蒼雲根雲氣濛濛化爲水

山半一泓清徹底大潦不溢旱不枯神功收歛常如此

李侯飲此水一杯便有兩腋清風來枕流漱石意不慙

觀海直上涵空臺臺下萬里連空蒼天以海水爲低昂
不識十洲三島落何處但見螺髻數點烟微茫爛銀堆
裏黑如豆布帆百尺飛下黃盤洋李侯徑欲掉船去高
浪如山那能渡飛觴遙奠外蒲山海潮吹入龍祠樹李
侯別此今三年聽鼓應官殊可憐連朝痛飲吳山麓昨
夢猶尋鳳眼泉我爲此游增太息竟合裏糧先十日
孟冬朔旦可觀日月合璧五更東炬陟千峯日月雙輪觀合璧雪裏
丹邊態萬千收入新詩更奇特仙雲飄泊今人間君才
如此緣復慳太白書堂終古閒曷不從我游廬山

王竹嶼通守屬題白雲迴望圖

嗟我與君皆少孤平生積願求反哺百一未酬心力痛
感君同病增欷歔君才卓犖千里駒入貲求仕計頗迂
聊以祿養明區區越中山水清且腴櫻筍沉足供行廚
春暉一失寸草枯亟謀窀穸歸南都兩棺並舉桐谷隅
表以貞石文不誣墓門手種松千株青山慘澹雲模糊
出門一步三躊躇我父前歿母不愉卅年家難兼官逋
負米負土朝復晡心依膝下身江湖一第未許承歡娛
衰鬢年年愁倚閭就養幾日眉暫舒冷官滋味苦若荼
嗚呼吾母今亦徂覲顏偷活胡爲乎展君此圖淚連珠
風雨夜夜聞啼鳥願君大節忠孝符瀧岡阡表礱石須

名父賢母千秋俱所生既忝死亦幸有子如我不若無

曾賓谷中丞邀游西山賦贈

出世有仙骨入世須仙才功成坐擲印如斗萬里踏雲
歸去來進既尋常退不早松桂騰笑山靈猜西山咫尺
如蓬萊有約不踐胡爲哉君持綠玉杖遠辭金筑山黑
頭報國事粗了綵衣奉母身能閒洪厓井邊一相見拍
肩長嘯非人間昨尋許令今梅尉手把芙蓉挹空翠逍
遙之嶺風雨池裊裊笙聲來鶴背昔聞旌陽拔宅飛上
天雞犬騰踏皆紫烟又聞子真棄官隱吳市一朝脫屣
輕妻子避世名高身太孤濟時道廣恩應殊人天此理

安可誣我非仙才與仙骨閉戶深山徒兀兀曷若去從
汗漫游上窮三島下十洲餐花飲水無春秋不爾達觀
爲狡獪采鸞寫韻文簫賣此亦頑仙天所貸

鏤柱宮步月

昨日眺蛟臺下宿顏雲壓檐江撼屋今夕拄杖逍遙山
月出翠微蒼靄間庭前古柏晉朝樹鐵幹千尋大於柱
濃陰覆地疑深潭滿院幽香襲風露露臺仰視北斗橫
鸞鶴馭空如有聲青天萬里無纖翳卻與仙心同淨明
賓谷初贈詩云我種柑橙請結隣繼有西山不能
住之句恐違所願要之以詩

西山雖好不能住我聞此語摧心顏數椽茅屋計猶左
廣廈平生誰萬間君昔游西溪待我牽漁艇鷗鷺前盟
不可尋釣絲裊裊沈秋影又愛青芝山欲買山下宅一
鋤明月三徑荒梅花未種今頭白人生所患志不堅青
天可階海可填冰炭相愛膏自煎因循坐誤三十年況
君忠孝本根植以此求仙非倖獲故鄉山水近復佳及
今閉關計尤得移居我作西隣家擁篲爲君除落花君嘗
自號西溪漁隱又稱
青芝山下種花翁

賓谷先生題廬山詩後推獎太過賦此爲謝兼訂

同游

君未入廬山詩已得山氣五老之峯三峽橋雲湧濤驅
隨所至我作廬山詩筆力讓雄鼻古來生面開者誰但
以冥心求獨造君攜我詩游西山讀之澗水松風間謂
我與山俱入化襄陽太白同追攀嗚呼此語實逾分妙
旨自足傳金丹我讀君詩憶廬山彭蠡一夜扁舟還君
昔看山愛其影霽心已入湖天閒君有舟中望廬山詩東林踏月
記清迥一雨未免嗟緣慳何不袖詩偕我去直躡黃巖
最高處此筆一擲生雷風青天飛出雙白龍

賓谷丈又題武夷詩後用題廬山詩韻奉謝

一卷仙詩讀纔罷風袂飄然疑羽化夢尋三十六奇峯

鐵笛猶吹明月下先生健筆摩絳霄坐使山川受凌跨
賓雲一奏幔亭秋萬丈虹橋許同駕曾孫小別已千載
擾擾人間苦無暇捧雲便訪十三君洞口碧桃花未謝
狂游不避山膏罵

次韻賓谷中丞飭萬輞岡屬畫西山紀游圖

七十老翁吾故人其人與筆常清新隨意揮灑皆天真
變化古法妙入神青衫不澹東華塵鹿車偕隱惟少君
謂蘭因
女史三間茅屋東湖濱丹黃堆案花圍身坐閱世事

如浮雲此心湛然秋月輪子久元鎮君其鄰嗟我一別
雙鬢銀幾見冰雪回陽春昔徇薄祿娛衰親旅進旅退

慙踈踈今也受錄爲外臣

用李太白事

種松何日生龍鱗神

仙在世同憂貧

用見贈句

寫韻所獲纔五緡話舊且復沾微

醺一蓑一笠意所欣白鷗浩蕩誰能馴西山招隱況同

社南州決計充編民持詩乞畫休厭頻雨點請用王維

皴

余別麻姑二十九年矣昨登郡城望山色甚佳游

興頗逸適李君牧臣見招遂與偕往道中微雨

薄暝入山宿五忠祠夜半始晴踏月至龍門橋

聽瀑聲甚壯明晨復造橋下觀龍潭及玉練雙

飛處飯後遍覽丹霞洞碧蓮池神功泉葛仙井

諸勝遂陟逍遙峯頂俯瞰城郭山川一掌可盡
故侶前游杳若斷夢輒成短詠以寄所懷

麻姑吾故人卅年阻良覲浮生寄塵海幽夢結泉石郡
城昨臨眺清游話疇昔仙山依舊青吾髮嗟已白覽古
循前跡探奇愜新獲林鳥亦多情嬌啼導行客

隔城見山色尋山殊逶迤遙嵐掃新黛連娟若修眉烟
雨復相媚開闔無定姿始悟化工妙意匠非所期

山行緩逾佳雨氣倏成暝輿竿任低昂蓑袂漸淒冷入
山覺雲重到門知寺迥虬枝鬱千尋猶記蒼官影

夜深月漸出徘徊上松梢踏月聽寒瀑遂至龍門橋怒

龍挾雷電百戰氣愈驕水光更激射山勢俱動搖跌坐
依圓蒲眾音歸寂寥攝心湛孤月閱世如奔潮

橋下合諸潭蓄深發逾壯昨夜烟月中未見此奇宕狂
濤逼驟分危石屹相向百折會雙流一落注千丈濺雪
俱斜飛驚廳屢迴漾萬劫誰雌雄銀河界青嶂

飛流太奇恣靜者淳爲泉鏡光照虛碧乳花沸清圓應
祈有甘澍雲物隨蜿蜒一勺寧謂多神功收自然葛井
亦堪釀服之能駐年

嬋娟昔冲舉石室扃丹霞洞天久寂寞瑤草猶根芽鸞
鵲想延竚天風吹鬢斜妙香被池水曾種青蓮花

曠懷騁遐矚載陟逍遙峯下視彈丸小孰云百雉崇肝

黎二水

兩衣帶明滅烟景中毛女及花姑螺髻青濛濛

吾身渺一粟大地滄海同笑摩五老頂去踏雙芙蓉女

峯花姑巖五老峯東芙蓉峯西芙蓉峯俱見山志

雨霽游麻源第三谷踰銅陵石磴陟華子岡訪雲

門寺不得遂循溪路而歸

東髮誦圖志幽棲慕麻源曩游惜未果今約寧再緩微
雨夜來歇霽色周川原風蝶暖成隊烟鷺明驟翻綠溪
入三谷傍花行一邨紅泉旣清綺碧澗仍潺湲崇岡石
躋磴廢寺雲扃門滄桑悼往劫鸞鶴懷高鸞子期肯持

釣康樂乃乘軒出處一異趣榮瘁安可論白菴故豪邁
游倦思息轅耦耕悔不早夙好誰同敦君晚年自署我
生百臺集學道慚鈍根惟借山水妙暫滌身心煩此間
足登眺所事惟田園力穡兼讀書庶幾宜子孫移家願
投老養疴先避喧勞魚縱江湖逸翮辭籠樊沈冥豈初
計疎拙聊自存持以謝亡友一踐平生言

宜黃有山曰石碧甚奇中秋偕余一齋踏月作歌
往年游武夷佳節誤風雨踏月狂歌廿六峯中秋卽過
吾能補昨聞石碧奇連夜幽懷騁一笠飄然遂入山渾
身綠透松杉影松梢細路千盤迴亂峯忽轉平田開泉

聲不識落何處穿林度礪聞清哀一寺峩峩山半出前
有危樓中淨室遶門流水自成溪瀑布斜飛衣袖溼一
山跨空爲石橋橋身橫卧當層霄橋下洞天頗軒豁吞
吐白雲如海潮看雲我正坐磐石四山蒼然來暝色高
樹長風捲怒濤懸厓恐爲乖龍圻須臾明月升天東岩
花澗草先玲瓏我行對月弄清影月亦隨我移吟筇月
下道人吹鐵笛笛聲搖曳迴天風風定三更月亭午一
輪皎皎臨中峯峯峯積氣化空水爛銀盤浸青芙蓉浮
雲萬里淨一掃人海垢濁皆水融我聞諸佛以月作名
字清淨解脫妙義同吾心之月亦殊特五蘊偏若雲相

蒙但能離垢卽無礙世界普入圓明中青天萬古玻璃
色明月年年有今夕請將法慧證華嚴我與此山誰主
客

清淨月佛解脫月殊
特月佛皆見華嚴經

香蘇山館古體詩鈔卷十終

香蘇山館古體詩鈔卷十一

東鄉 吳嵩梁 蘭雪

寄楊雪帆方伯吳中

天生俊傑爲時出窮達偶然難自必一日之長泥憶雲

嗟我與君皆丙戌

君于三月廿六日生余則廿五日也

君偕吾兄貢成均

筆力已掃千人軍吾師許我得詩髓拔之俾與籍湜羣

百五人中補其缺始謂廬阜能嶙峋

翁覃溪師初贈詩云百五人中補此

人始知廬阜最嶙峋嗚呼此語吾滋愧卽以詩名惟一技卓犖如

君信絕倫年少早儲公輔器射策雖邀特達知京華薄

宦同憔悴居常比屋出偕軍風雪典衣謀一醉終軍慙

慨請長纓投筆能爲萬里行
盾墨磨烟朝艸檄劍花斫
地夜論兵歸入樞廷專筆札
外持使節按江城分陝旋
臨周召地籌邊果繼范韓聲
故人潦倒重相見握手東
華泪如霰雞肋難拋爲旨甘
鳳池初入猶貧賤誰知反
哺事艱難夜夜啼烏聲苦酸
當君乞病辭方岳我又銜
哀返故山君今再出爲開府
是我當年連榻處香烟夾
道篠簕迎手栽已徧甘棠樹
天下財賦推三吳河餉軍
需常預儲先崇政體爲根本
肯令民生腹吏胥此邦風
俗窮奢麗金粉能銷英邁氣
君持清節挽頽波滌山
川返瀟粹況聞督撫皆公忠
人才吏治關心同東南政

成今若此海內久安可知矣我生有母不歸田身後徒
勞銘墓阡春暉寸草報無日卷施心死冰霜纏若論文
章能不朽忠孝先虧復何有平生知己大賢多萬事浮
雲今白首君年相伴髮未皤及時建白毋蹉跎致

君堯舜道稷契莫令青史畱譏訶君不見吾鄉舊友同

歲生鍾溪

陳少寇希曾

元淑

樂孝廉鈞

俱已矣陳主文衡樂著書

平生志業今餘幾廉山

萬郡丞承紀

賁生

黃大令郁章

稱異才州

縣浮沉亦可哀吾身草木甘同腐一櫓漁歌歸去來

贈朱穎艘大令

盛世重牧民公卿半循吏教養匪專司蒼生何命誰寄賢

侯學道人厥心勤撫字澄清先本原設施觀次第側聞
下車始一切屏供億首卻常例錢已奪羣奸氣嗚呼政
體崇權豈逮胥隸所取皆民膏迺欲以官市聚斂借征
輸舞文善窺伺初爲狐兔憑終且虎狼噬吾邑嗟彈丸
民力況凋敝補救不及時倖生恐無地廉著威自行法
明恩可繼卹隱先疲氓程才徧寒士吾衰方杜門未獲
因公至感激聞近村誦言亦流涕願侯持此心推仁久
毋替名宦媿周諸吾當續前志

余修縣志嘗爲周公相
諸公大倫撰名宦祠碑

示三姪

孤心涉歟夢以理爲距迎惟處骨肉間理窒通以情情

以至誠感理以反照平二者乃俱格豈與非類爭避之
無所校修身俟其清家運不終替啟迪惟先靈汝輩皆
少孤吾撫自孩嬰教養吾所愧心力瘁亦并吾昔邁多
難諸父誰我矜保全出天幸覆轍寧不懲汝今雖無田
猶有屋數楹官逋已恩貸謀養惟筆耕汝母近益
衰老淚常縱橫勉求一日歡毋使百疾撓定力以持變
達觀以全生四海汝弟兄九原吾父兄

月夜讀東坡詩三首

明月溼我衣此語特超忽其溼非露華寒光濯心骨一
片吾心月十年衣上塵雲能載我歸我亦呼白雲

水
中百東坡雲中一居士水雲了不隔觀妙當如是世
人多謗公爲公得道資公自有真我物豈能磷緇

公昔踏月杏花下月如流水涵青蘋承天寺又尋懷民
竹柏影中惟兩人是水是月何所分公本胸中無一塵
杏花竹柏亦何物得公詩句常清新他年月夜渡南海
萬里飄然身一芥人天齊放大光明詎以浮雲爲障礙
世人多事生差別公已騎鯨去飄瞥我恨不獲從公游
下視蓬瀛同一漚

集杜三首寄陳薌谷中丞兼懷故制府張菊谿丈
整頓乾坤濟時了富貴應須致身早同學少年多不賤

看我形容已枯槁鯨魚跋浪滄溟開鳳皇麒麟安在哉
致

君堯舜付公等黃帽青鞋歸去來

嗚呼房魏不復見

謂朱文正公戴文端公

嬾迴鞭轡成高宴歲云

暮矣多離憂笛聲憤怨哀中流長淮浪高蛟龍怒拔劍
欲斬且復休注目寒江倚高閣迸淚幽吟事如昨詩卷長
留天地間焉知餓死填溝壑

天地慘澹忽異色酒罷酣歌拓金戟浣花草堂亦何有
飄零已是滄浪客君不見志士汲引難生無所成頭皓
白百年死樹中琴瑟虎倒龍顛委荊棘此心炯炯君應

識

寄陳石士編修

以下七首皆集黃山谷句

海宇日清明用儒吾道盛陳子善學問相待汲修綆才
高用苦遲官冷殊未稱百口常憂煎補外儻天幸不然
事陸沉收此桑榆景我老倦多故決去事幽屏故人不
可見楓葉江路永富貴安可爲成功渠有命何時真得
歸與君酌南癭卧看人行天如晴月生嶺城南有佳園
除草開三徑呼兒斲春醪戒婦饌湯餅塵勞敗天倪多
慮乃禪病請以此心觀一笑六窗靜

聞顧南雅同年督演學乞假歸吳

詩名二十年交臂各衰翁顧公甚魁偉筆端吐白虹萬
里一帆檣超俗駕長風斯文已戰勝還家雙頰紅
高浪駕天來山立有餘勁別後事萬端熟思令人癯囊
英不重朝松柏千歲永相從寄琢磨洗心日三省

石溪館詠懷

世紛甚崢嶸同知圓覺性十年身百憂保此一微倖卧
疴常閉關傲世似未敬養生遺形骸悟罷本非病
守心如縛虎涉世如虛舟自悲聞道晚念此人生浮反
身見萬古醉眼槩九州胸中有佳處人間何所求
舊山木十圍桃李春成徑掃花坐晚吹書帙映斜景夜

泉鳴竹渠滿慰傾耳聽寫之朱絲絃境遠心亦靜
天地復其所物我同觀遊自脫魚鳥性坐閱草木秋滿
船載明月詩成著床頭一醉解語花身當萬戶侯

雨後觀畦水有作

四山足春雨繞屋多泉聲奔流下稻田百畝倏已平石
瀨收眾響風漪媚新晴山皆倒影卧樹若懸空生塗泥
豈不污一虛涵太清卽事觀妙理且愛循畦行

試茶用山谷韻寄石谿漁婦兼懷素素閒閒

老夫病渴宜隱居日對遠山惟著書一甌湛碧煮團月
得句徑欲探驪珠況君筆妙清且腴胸中邱壑吾不如

石鏡記畫水邊屋花時細說金牛湖

一姬雲鬢才上梳一姬臨池耽學書并華猶道未芳冽
手傾翠盞煎荷珠露香小啜百憂除如願可乞不如
夜涼一雨睡差美釣船昨夢歸南湖

寄秦小峴侍郎常州

淮海別我已三載閉門喜讀桑苎書惠山名泉誇第二
記同坐石看噴珠竹鱸妙製煎雲腴能滌心垢參真如
論詩願領色香味公評余詩三者俱足九峯青墮芙蓉湖

寄馬秋葑太常杭州

葑翁先我赴南海佳句每倩郎君書荔支飽噉三百顆

老漁上會言集 卷二
歸裝勝壓千明珠世緣一切皆彌除此老肺肝冰雪如
結鄰有約要終踐樓可對山兼望湖

寄曾賓谷中丞南昌

南豐乞養方閒居玉塵細碾繙仙書洪厓井泉昨新試
煎點未須煩綠珠晴烟裊裊紫堦除鶴陰清唳今何如
紅藕花開一千頃定攜茶具游東湖

題石谿漁婦自寫漁隱圖

我詩不及松雪翁君畫豈能仲姬匹當日寒江畫釣蓑
鷗波以後誰仙筆旁人道似元真子吾家却有兩樵青
斜風細雨不歸去漁歌喚靄殊可聽海天萬里生怒濤

一釣何當連六鰲不如投竿故溪水與君共食鯉魚尾
漁兒漁女收漁罾明月滿船吾醉矣水邊添著萬桃花
便入紅雲深處家卻笑武陵舊漁父仙源容易卽迴槎

由南昌至吉安舟行雜詩

浮生寄人海羈旅況扁舟十日三百里茲行太淹留吾
舟溯江上逆水兼洪流五月南風多安得怨石尤君看
下水船豪氣橫九州觸險因迴風帆飽難遽收快意慎
自持躁進貽隱憂窮達亦有命吾老將何求

前日豐城來積雨水驟漲附郭皆良田拍天生巨浪舟
行歷數村村居半樓上艱難覓渡船以樹牽百丈寸進

姑苟安盤渦倏驚宕挽迴竭人力倖生荷天貺旅泊負
佳節濁醪慰無恙臨風發浩歌江聲激悲壯

樟樹古雄鎮舊游三十年文成誓師地戰壘惟寒烟主
客此同醉拒霜紅照天孤根餘病花今亦非昔妍大儒
樹奇勳多難乃倖全吾儕書蠹耳老死安足憐所惜平
生歡抱琴歸九泉清門豈中替夢落西湖船

懷故通守
徐君袖東

新淦與峽江相距未三舍孤城踞山巔吾舟過其下雲
氣忽奔涌雷雨足驚咤千山皆遁藏一帆敢凌駕停橈
待新霽日光漏雲罅溼翠沾我衣微風亦相借晚炊何

處村餘烟散桑柘有人聽溪聲潺潺稻田瀉

舟沿西岸行江岸何逶迤一灣復一灣眾山亦相隨東
望千萬峯反照無定姿起伏如波濤雲烟爲合離出峽
江面寬入峽山勢奇地或名桐江佳處絕似之惜哉暴
雨後黃流太奔馳不及富春渚清深宜釣絲

擁被聞雨聲枯坐歷殘滴夕陽開晚晴幽悰展遐覲隔
水多奇峯層雲屢中折連岡逼高岸懸流曳飛白橫山
亘其前隱現若龍脊積氣爲浮嵐杳然際空碧閉門有
書卷推蓬有山色看山讀吾書吾自適吾適

惠風和且柔帆影自遲遲助以牽挽力終日相推移扁

舟何處來寸勞靡所施一葉漾中流渺然不可追南北
趨向殊順逆理易知物我能兩忘造化初無私

繫纜就沙渚倏改西北風舟人卧復起連帆張夜中是
時月初霽薄雲漸銷融江光白浩浩山氣青濛濛吾帆
百尺高破浪如行空奔騰失兩岸滅沒踰千峯積勞酬
暫逸久塞常驟通天意未可知且勿悲途窮

申夕張兩帆俄頃十餘里風息帆旋收斜月墮江水乾
坤退步寬吾生貴知止所得豈在多躁妄或免矣踏月
江岸行清陰散衣履釣翁卧鄰船天涼睡初美

扁舟遡江去日日趨前峯曉來訝初失天水惟空濛詎

知江岸迴山移吾櫂東白雲復斷之積氣浮千重須臾
雲破碎初日射瞳眈一花插天半還我青芙蓉

吉水天下秀萬山圍縣城一峯最殊特峨峨臨太清所
由鍾毓厚賢哲常挺生道德植今古其次爲功名哀哉
後世士乃以科第榮吾少不自立隨俗爲重輕嚮道今
已晚夙志無一成高山愧仰止老淚惟霑纓

青原古名山距城廿里遙山中有古寺高樹森層霄文
公昔過之青琴時一調微風松際來花雨同瀟瀟君恩
念高厚壯節憂潛銷所以柴市血終殉匡門潮白雪今
已矣青霞誰見招吾師刺船去海天悲寂寥

覃谿師嘗
過青原山

寺有詩

午發廬陵北風甚利喜而作歌

夜帆前日發沙渚行逾十里風旋收榜人失望我差慰
天意有待毋多求今日船開風正北連帆高張箭鋒直
黃流滾滾拍天來破浪居然有餘力隔岸好山無數峯
峯峯日在雲霧中此時快意一掃空萬朶飛出青芙蓉
少年奇氣誇乘風五湖三山如渚宮可憐筋力倦多故
坐令潦倒成衰翁餘生幸未飼蛟鰐浮世久矣哀萍蓬
病身投老專一壑枯查貫月誰長虹川程連日風兼雨
百丈搖搖櫂歌苦但看掣電駕輕橈何用驚雷轟大鼓

六鰲之背高映天羅浮兩點埋蒼烟願觀南海擴胸臆
歸卧寒谿舊釣船

食鱖魚醉歌

江鄉俊物推鱖魚嘗新價欲高璠璣鄰船舉網吾軒渠
烹以江水鮮且腴萬錢下箸費踟躕無心得之味有餘
廬陵老酒清映壺小飲輒醉聊自娛仰天縱卧心太虛
飄然身世游華胥浮雲富貴何爲乎

山茭口守風步入彭村

相如負逸才滌器爲酒傭自著犢鼻褌當壚看芙蓉偕
隱豈不佳迺欲稱富翁其人非達觀所以頌登封吾舟

本附載行與估客同晝共烟火熏夜聽洪濤春此心不
自累豈受外物攻喧寂兩無礙翛然卧孤蓬

阻風復江岸意行近亦佳前村高樹多濃陰覆扉柴傾
室事農圃作苦歡仍偕炊者掃黃葉牧者飼青荑老翁
鬢如雪含飴弄嬰孩與之坐終日譚笑無少乖出處各
有營萬物俱我儕悠然觀眾妙久矣忘形骸

村南有茶肆結屋谿樹灣就陰避午熱小啜開旅顏江

水濁于泔佳茗煮亦慳清泉近可汲坐石間淙潺名種

沉武夷氣味如幽蘭雲霧

茶名

淪天花

井名

伯仲匡廬間坐

看白鷺影遙沒江上山江流方滾滾吾心自閒閒

啜茗吾獨適狂飲方眾咻歸船欲再出斜陽樹梢頭
思乃一笑吾身何百憂古來執賤役往往多名流或以
賃舂隱或從賣漿游玩世惟不恭傲物徒取尤胸中果
浩浩身外良悠悠頽然復就卧栩栩爲莊周

雲湫

地名可愛爲雲湫乘興遂欲探其幽老樹千章圍四周
我身未入心先秋荒徑時時踐紅葉高枝往往棲白鷗
樹陰缺處遠山出積翠嵯峨天盡頭蟠根若龍穿岸裂
其下渺渺長江流是時久雨積未收新萍淺水侵平疇
忽然斜照蕩空碧雲樹倒影天俱浮竹籬茅舍在咫尺

望之杳冥如十洲始悟一虛涵眾妙此心湛然真可求
嗚呼此心湛然真可求人海汨沒何時休

萬安午發雨後山色殊佳

昨日舟泊五雲城曉來風雨不可行風勢稍轉雨亦晴
好山遠近如送迎近者雲髻梳未成回眸一笑秋盈盈
遠者蛾眉掃長青插花起舞百媚生須臾卽之近又遠
神光離合難爲名前日我愛桐江橫今復得此妙且并
七里之瀧深以清釣石可釣臺崢嶸九里之洲蒨花海
種梅作田花代耕頭白不踐沙鷗盟一竿豈欲收長鯨
誰家暮笛參差聲裊裊權歌移我情

贛州晚泊

玉虹之水翠浪山人在白雲縹渺間我讀公詩今入畫
樓臺迥絕不可攀公昔登此望鄉國我眉天外浮煙鬟
身爲遷客忘淪落卻於塵外尋幽閒長風此來頗拒客
我行未免嗟阻艱差喜石鯨少鱗甲扁舟無恙辭驚瀾
螺亭咫尺在何處日暮漁樵空自還入境依然萬井麗
微雨斜陽開霽顏太息高人此跌坐龍斬虎薙依禪關
翩然捨去太孤峻絕物似非平等觀山鬼築垣豈謬敬
木客吟詩殊未嫺且沽美酒弄明月卧聽谿水聲淙潺

老榕行

松柏才大中梁棟歲寒有身爲世用樗櫟臃腫終天年
雪壓霜摧惟苟全嗟爾老榕亦散才一生偃蹇荒江隈
拔地易成得天厚十圍之樹多手栽其才雖爲匠石棄
濃陰插天人可庇四時柯葉無改青兀立嚴冬有生氣
無用爲用用益奇以此得壽壽固宜身甘樗櫟心松柏
嗟我與汝同太息惜哉廣廈無萬間百年風雨愁空山

舟影

朝日臨東圻萬景靡弗曜我舟逼岸行人物影俱肖
篙力健始移筵勢側逾峭百丈裊若絲孤篷小于轎檣竿
卧其間空波爲蕩搖娟娟溪上花掩映入閒妙倚船問

爲誰顧影方自笑此境畫頗難小詩寫吾照

水車

一里著數車水石爭喧豕飛沫灑驟雨旋輪轉輕雷以
之資溉灌可以甦旱災蒼生獲安飽吾行願遲迴今年
積雨多汝功何有哉何弗息汝機毋使行者哀古來豪
傑士救時展奇才時平無所用投老惟樽罍

白鵬

長江浩千里波浪高于山順流懼飄泊挽舟嗟險難有
鳥何翩翩其名爲白鵬掠波颺初去沿岸飛仍還忽然
雪數點吹墮蒼烟間高翔極寥廓俯視殊渺漫身輕易

遐舉心曠多餘閒自非羨魚者焉知行路難

聽蟬

春禽如少女花間語和柔秋蛩如寒士草根吟苦幽飲
露而餐風汝殆仙者流何爲不自默嘒嘒無少休兩岸
擁深樹千峰阻長洲疎雨止仍滴夕陽澹未收汝自鳴
其天俯仰何所求吾詩亦天籟與汝爲賡酬

書琅嬛仙館台州詩後呈阮雲臺先生

大儒懷遠畧經世常寬閒其學在澹寧所由濟時艱時
賢貪近功抵掌資瀾翻矜氣一中之爲害乃百端讀公
台州詩識量何超然軍興民不知旬月觀凱旋然當督

師始卽事多感歎先幾懷隱憂早在甌甬間精神格天
地風雷盪凶頑是爲仁者勇豈在兵力殫功成不自述
飄若雲東還職事安其常所戀惟湖山側聞寇初發禮
佛爲偵探所至耀其武頗視吾軍孱逋逃萃淵藪要結
通閫闔跳梁雖外夷養癰實內患其後侵閩粵禍烈恩
與循勦撫煩重臣滋蔓逾十年微公挫其鋒吳越已先
殘公初督學政豈不切痼癥所職在造士懼侵疆吏權
不見觀潮什特筆書鹽官一堤隔滄桑禹功嗟未完及
此夷寇平海濤復崩奔萬畝化平湖百室無一椽公曰
民病矣召災惟我愆倖逃鋒刃中誰計饔與殮籌賑苦

不給日夕多悴顏朱提四十萬飛章邀內頒又恐經理疎或有爲欺姦盡除胥吏蠹擇畀士夫賢錢穀善區畫戶口稽窮鰥遂使膏澤周不憂溝壑填於惟

聖人心覆幬同坤乾陰陽稍未和補救在所先節鎮荷重寄培養先本根濫者不足道賢者持小廉百廢甫一舉首慮經費繁徙薪計不早烈火方燎原何況水與兵其害尤易延公念國計重上體

宸衷淵沉幾濟以

敏實惠敷用寬是以兩涘民雖病獲速痊公來民頌謳公去民涕潛公前莅吾鄉遏亂亦未然至今民俗敦不以見異遷試士廣棘闡卹商免緡錢以此推其餘措置

皆可觀移節今海邦萬里無驚瀾虎門實天險華夷限
重關水師繞三路扼要歸中軍節制有常度坐鎮惟清
敦況以經術氣敷化佐羽干所慮降盜多積習未盡湔
職在良有司恤厚約以嚴使之習耕作庶幾安井閭公
兼文武資預養刑政源百僚奉繩墨萬彙歸陶甄經濟
出典謨大哉惟

王言

先生撫湖時奉
云經濟出自典謨

何事不可
溫諭有

爲勉爲一
代偉人

行將調鼎鼎一德孚人天致君以堯舜匡時

爲范韓鯁生愧薄植所業惟雕鐫譚語詎足采積蘊藉
稍宣竊願侍函丈讀書借琅嬛聞道倘有期不嫌雙鬢
斑

高恪勤公蓬萊仙館圖

且圍指法無古人秘妙流傳託仙夢當其得意手不知
逸氣卷舒天所縱誰諳孤詣出苦心一髮縈迴萬鈞重
力追小李師右丞筆法居然堪伯仲此圖仙館實少作
金碧樓臺照巖洞霞裾風袂五銖輕琪樹瑤花九霄種
瀑流穿峽疑有聲雲氣浮山真欲動請看界畫極森嚴
中有天機自奔涌詩畫由來妙諦參變化先求規矩中
名孫蒼崖少尹六法繼家學風骨蒼然頗殊眾惜哉抱此希
世珍閉戶清吟耐飢凍渡江我爲荔支來但有雲泉作
清供采芝終擬入羅浮當與仙人驂白鳳

二鳳行

事見明劉鴻漸書熊將軍傳後將軍名飛伍鳳姚鳳俱廣州人熊族子簡庵常作二

鳳行紀事今不傳因爲補作

文公勤王兵四起嶺南應者熊將軍將軍奇士有二鳳
曰伍曰姚皆絕倫粵軍雖勇戰無紀二鳳所當賊披靡
一鳳持槩能用奇一鳳善沒稱水犀平生有力並如虎
酒渴如龍醉能舞銅盤縱飲圍數重上馬殺賊如旋風
伍也先登身陷賊賊欲降之罵尤亟奮身一擲縛迸開
怒飛碧血污黃埃姚也殿後賊追至反戈刺賊賊皆殪
跳身入海海不知去作江湖漁釣師招之不降投櫂起
大醉三日慟且死嗚呼宋朝養士三百年士不食祿恥

戴天將軍以死報丞相功雖未成志能抗榴花塔下陰
雨多至今戰鼓聲悲壯將軍得士勇且忠二鳳之外邱
明許鑑之同狀元宰相乃負國君不見留夢炎陳宜中

黎齋潘鈞石為黎
二樵山人作

東樵西樵樵所居石溪一水吾所漁漁樵並時不相見
各以新詩闢生面樵詩鑿險山為穿怒龍出峽風湧泉
雷雨忽收眾峯靜月華皎皎雲娟娟漁詩擲筆青天外
騏驎踏空九州隘有時造意入深微滄海浮杯舟一芥
以正出奇奇愈妙詩境不同皆獨造江山靈秀萃兩生
卅年曾締蘇齋盟翁覃溪師題邱東河太守所藏奚鐵
生畫卷云此卷得蘭雪二樵詩江山

靈秀萃此
几上矣

樵乎翩然采芝去新句如花開古樹漁也孤
吟持釣竿鰲背跂腳天風寒吾輩千秋貴知己契台何
須論生死黎齋今見鞭香人私淑居然稱弟子嶺南名
士多於鯽太息難逢此狂客魚山馮芷灣宋吾舊交恨
不從君看潑墨草堂五百四奇峯詩骨瘦削青芙蓉漁
樵身後定同社醉踏仙山雲萬重

良泉

羅浮四百卅二峯但得一畝堪吾宮瀑布四百八十道
此泉晚出兼眾妙吁嗟步蒙子汝以何因緣蓬萊左股
據其一鹿車偕隱仙乎仙山中妙處難盡搜隨地所得

爲天遊以養吾性砥吾行木石尋常皆可敬吁嗟步蒙
子知我方少年吳越俊游花照天美人名士今成烟白
頭歸釣南湖船十載飄蓬無定所合離也似因風雨昨
來把酒醉江樓先喜游山逢地主萬事如雲不可期結
茅無計且尋詩願磨翠壁三千丈橫掃淩雲筆一枝

峽山寺用東坡韻二首

江路入中峽寺門俯寒灣嶺雲如故人一笑開霽顏前
游惜未泊歲暮今始還猿嘯不可聞鶴夢殊相關浮生
念人海投老惟仙山六時花雨中萬樹風泉間孤心掃
羣籟妙理觀轉環江天亦無盡縹緲餘烟鬢

我昨泛明月來從荔支灣清遊曠奧兼及此登孱顏白
鷗亦何心飛去仍飛還攬勝旣花塢參禪又松關嗟彼
袁氏女嘯雲歸故山人天大解脫妙悟彈指間我詩若
寒淙清音銷佩環綺語願終戒畫壁輸雙鬟

帶玉堂次壁間翁覃谿師韻

詩骨誰似山峻嶒句法我就蘇齋徵東坡當日此追餞
寺名何以題廣陵舒州飛來事尤誕梅關掛角同誇稱
臨江跨海地雄秀二禺高已羣山凌山根石濤恣奔囓
山頂雲樹常翻騰金碧半空日光射紫翠千重山氣凝
萬松之杪樓一登濃陰自古無炎蒸我嘆觀止爲撫膺

誰云造物無全能天樂忽奏羣仙謦天花霏雪珠瀉升
天龍酣戰雷雨憑風力所掣迴霜鷹平生意氣狎河岳
壯游至此難爲矜一碧下注湛徹底凭闌俯視攄紅藤
始信動靜有常理奇才晚節多冰兢吾師學道卽詩法
江山之助神力增昔游泰岱攬飛瀑遺墨至今珍百朋
蓮洋得髓愧何有鬢絲老矣哀髯髻此詩作又三十載
籠紗賴有雲堂僧木樨香裏悟無隱請以妙諦參傳燈

解嘲

吳生歲暮將告歸陸行多累舟嫌遲仲公拓爲我畫良
策俾我不誤還山期此去韶州溯三峽舟行雖緩無他

疑下至南雄四百里江水太渴舟難移捨舟而陸計差
便庾嶺正及梅花時曲江地主有賢令荀興簾笈皆可
資昨抵關口天已暮凌晨遺札告所須主人將出聞者
倦謂當遣役來致詞延伫竟日斷消息進退無據方趁
起一役軒然來水湄首詰所由疑詐欺次言陸行多險
巖改用小船或庶幾氣懾船戶指以頤索價三倍仍居
奇告以裝輕我自泊但乞使者加護持役拒以色船徑
去怒旣不能悔莫追一僕坐視惟腹誹謂行不早困固
宜斜陽黯黯風淒淒下水風帆來若飛平生壯遊誇海
岳窮途未免傷孤羈欲速不達古所戒干人已誤將咎

誰主人之賢豈至此城狐社鼠徒爾爲耳目所壅不在
遠一事如此他可知我行雖困無異患歲暮窮檐吁可
悲已拚淹滯到明歲蓬窗自酌屠蘇卮昨宵大雨忽奔
注江水驟漲冬亦奇鄰船可行願同載一篙去畫黃琉璃
眼前通塞尙難料萬事如雲從所之人厄幸免天意
厚游山且和東坡詩

余慕羅浮久矣比欲往游屢約未踐因次東坡韻
三首以寄吾意

羅浮積翠連瑤京仙山鸞鳳常飛鳴蓬萊咫尺在人世
洞天徹底皆虛明老夫蹤跡半天下此遊未踐孤平生

仙花仙草種滿地紫烟誰喚蒼龍耕游山自許躡大謝
著書何者哀老彭瓊霄萬仞丹梯橫步虛欲上身須輕
鏡湖明月不飛渡太白徒爲天姥吟武夷之君我舊識
實雲仙宴懷同庭五老招我入蓮社麻姑約我尋蔡經
我師抱朴友坡叟每讀酒頌如箴銘求道未能已忘世
脫屣笑辭公與卿綵蝶飄然許騰跨腳根莽莽千山平
昨夜奇情天忽縱倒海移山爲戲弄大醉亂踏青蓮花
狂游直入朱明洞天樂隱隱何處聞雲馭飄飄不須韉
采芝爭認故人來騎鶴未嫌凡骨重筇杖同攜度鐵橋
桂釀居然發金甕一龍天半忽怒飛千山樹杪俱浮動

鮑翁葛壻此移家經卷藥鑪應可共扣門迎笑縞衣翩
爲我殷勤說前夢別後梅花依舊開滿身明月邀誰送
人天回首殊渺茫雪海歸來忍奇凍飛雲絕頂惜未登
夜看滄波紅日湧一聲畫角霜天高惆悵南枝喚青鳳
海風浩浩天無涯浮生但以雲爲家壯遊百越亦何有
鄉心輾轉輪隨車歌舞岡前昨攜酒素馨開徧宮人斜
看山一醉落烏帽豈有風流追孟嘉仙棗幾枚願分啖
綠骨不如侯道華參橫月落夢先醒此生已負花村花
荔支初嘗託奇妙曲江一賦吾何加南華佳實亦風味
白李未許廬山誇蒲礪曾經餌九節韶陽底用栽三桮

才人自昔慕冲舉況有岩谷棲青霞風塵碌碌悼輶驥
鄉曲依依憐井蛙卧游五岳在庭戶曠觀四海如涔窪
要須廣博出胸臆詎以出處成參差同心海內不多覩
聚散往往驚搏沙年來憂患閱已飽世味淺薄真如紗
只有青山足良晤白雲萬古無纖瑕鷓鴣之峯在何處
行人歲暮良可嗟江鄉亦有好林壑嶺樹猶復相關遮
老漁蓑笠辦已久石溪一逕非幽遐歸話仙山約偕隱
種梅更覓鋤金鴉

夢騎仙蝶看梅花歌

我未入羅浮先賦羅浮詩梅花萬樹入仙夢自託仙蝶

吾能騎仙人愛我詩謂我有仙氣夢中真遣仙蝶來導
我騎之恣遊戲蝶翅五色如車輪我跨其背雙翅分翩
然一去不知幾千里腳底四百三十二峯皆白雲雲氣
濛濛溼衣重浩蕩天風復吹送乘風先上花首臺踏雲
更下黃龍洞洞中龍女聞我來一笑手擘丹嶂開羣靈
雜沓獻歌舞萬花搖入銀濤堆我謝龍女且歸去重到
梅花最深處仙人指點說前游花落花開已無數此花
託根惟此山千劫不墮塵埃間飛花一片著衣袂奇香
馥郁三百年吾昔以花飼吾蝶蝶乃馭氣爲飛仙君本
吾儕今暫謫仙蝶梅花皆舊識不然騎蝶看花來只恐

仙山少顏色我聞此語重嘆嗟恍然一夢如離家蝶乎
縱汝踏空去吾亦還山餌此花

憶石溪梅花次東坡松風亭韻三首

種梅我昔居水村水邊梅影皆詩魂花時倚樹坐終日
豔雪照破溪烟昏今年花謝我暫出梅子離離青滿園
嶺南夙稱萬花海深冬氣候如春溫此花高格愛閒冷
恥與紅紫爭朝暎故溪花開今幾樹寒香深處關籬門
天涯倦客嗟未返離愁欲訴難爲言憶梅預索巡檐笑
綈袂誰與擎青尊

松風亭畔花爲村此間曾有坡仙魂仙詩一哦萬花笑

豈與木槿爭晨昏紅羅玉照非所慕種花往往宜溪園
蠻天可惜太荒寂縱有美酒難爲溫我讀公詩破離恨
有若積雨開晴暎幽尋隨地有佳處便築花塢編柴門
一枝竹外見清影看花臨水俱忘言先生往矣孰同調
且邀明月浮金尊

昨夢又入羅浮村花前一別曾銷魂美人臨水影同瘦
明月當花疑未昏斷夢不知落何處此地安知非故園
溪聲攪人徹清曉幽香已散袞誰溫水邊忽見好籬落
花光豔發扶桑暎孤蓬小泊引徐步恰有溪叟爲開門
看花棖觸記前事翠禽嘲啻聞清言何時踏雪艤歸櫂

花下醉倒傾千尊

禽言五首

提壺盧提壺盧美人如花當酒鑪東施一笑千斛珠黃
金如山葬庸奴有酒不醉胡爲乎萬花昨日今青蕪
泥滑滑泥滑滑陷我青鞋污白襪襪猶可浣鞋可脫此
足一失難自拔萬里之窮跬步間何必啼猿上三峽一
踐春冰吾白髮

得過且過得過且過羽毛五色今摧挫當日鳳皇不如
我琅玕不實桐無陰一別丹山鳳寒餓戢影空岩吾尙
可

行不得也哥哥行不得也哥哥江聲激激山峩峩入峽
出峽顛風多舟行逆水殊蹉跎下灘一擲如驚梭船底
怪石森矛戈道險天寒君奈何

不如歸去不如歸去江山縱好非吾故故鄉雖少一頃
田栽遍梅花三百樹花光照天香撲人踏雪猶能認歸
路吾婦彈琴兒誦經全家俱在花深處風雪何爲傷歲
暮

王簣山觀察出示其祖龍虎將軍征倭時所得寶

刀作歌以紀

將軍名良相
事見志乘

百鍊之鋼萬人敵化作長虹飛海國將軍乘勝奪此歸

卽以倭刀殺倭賊嘉靖以後倭最强水邀陸擊難周防
樓船千里蔽空下誰揮巨刃摩天揚刺賊不用梨花鎗
燒賊不持燕尾炬一片刀光潑陣雲遙識將軍酣戰處
將軍如虎刀如龍騰山踏浪雷以風徐海就擒王直死
惜哉未紀將軍功將軍之功世少匹督師胡憲宗與參將
戚繼光往者奇兵泰山出羣盜盪平纔八日此物狼山餘
手澤述祖詩成追史筆海天萬里今無波刀雖善藏名
不磨利器乘時終奮發奇才養晦非蹉跎請看使君匣
中三尺水夜夜神光燭霄起

香蘇山館古體詩鈔卷十一終